



Repubulika y'u Rwanda
Ibiro bya Minisitiri w'Intebe

Itangazo riturutse mu Biro bya Minisitiri w'Intebe risaba abantu kwirinda icyorezo cya Coronavirus

Mu rwego rwo kwirinda no kugabanya ibyago byo kwandura Coronavirus, Leta y'U Rwanda yashyizeho itsinda ry'impuguke zitandukanye kugira ngo basuzume barebe uko twarushaho kwitegura guhangana n'icyo cyorezo kiramutse kigaragaye mu gihugu cyacu.

Nyuma y'isuzuma ryakozwe n'iryo tsinda, Leta y'u Rwanda iramenyesha abanyarwanda n'abarusura kibi bikurikira:

- Kugeza ubu nta Coronavirus iragaragara mu Rwanda;
- U Rwanda rwafashe ingamba zikomeye zo kwitegura guhangana n'icyorezo cya Coronavirus;
- Dukurikije ubukana bw'iki cyorezo n'umuvuduko uri hejuru gifite mu gukwirakwira mu bihugu byinshi ku isi, turasaba abanyarwanda gufata ingamba zikomeye no gukurikiza inama za muganga. Virusi yandurira mu dutonyanga tw'amazi dusohoka mu mwuka umuntu ahumeka, iyo umuntu wayanduye yitsamuye cyangwa akoroye yegereye undi; umuntu ayandura iyo asuhuje n'ibiganza cyangwa akoze cyangwa yegereye uwayanduye.

Kubera izo mpamvu, turasaba buri wese kubahiriza ibi bikurikira:

- Kwirinda guhana ibiganza no kwegerana cyane, (urugero guhoberana);
- Kwirinda gukora ingendo zitari ngombwa mu bihugu byagaragayemo icyorezo cya Coronavirus;
- Kwipfuka ku munwa no ku mazuru igihe ukorora cyangwa witsamura mu ruhame;
- Gukaraba intoki buri gihe ukoresheje amazi meza n'isabune cyangwa arukoro yagenewe gusukura intoki;
- Kwirinda gukora ku muntu uwo ari we wese ufite ibimenyetso bya giripe, inkorora cyangwa umuriro uri hejuru;
- Ihutire ku ivuriro rikwegereye niba ufite kimwe muri ibi bimenyetso: giripe, umuriro, ibicurane, inkorora no kubabara mu muhogo

Minisitiri y'Ubuzima n'izindi nzego bireba zirakomeza gukorana mu gushyiraho ingamba zo kwirinda no kurwanya icyo cyorezo.

Bikorewe i Kigali, ku wa 6 Werurwe 2020

Dr. Edouard NGIRENTE
Minisitiri w'Intebe